



COOK ISLANDS CHRISTIAN CHURCH

Executive Council

Head Office Phone: 26546 Fax: 26540 Email: adminpub@oyster.net.ck P.O. Box 93, Rarotonga, Cook Islands

~~~~~

9 Titema 2005

Ki te au tavini rave angaaanga katoatoa i roto i te au Ekalesia CICC i te Kuki Airani nei, Nuti Reni e Autireria

### KARERE NUMERO 3 MEI ROTO ATU I TE KUMITI AKAAERE


Kia orana,

Te rekareka nei au i te tuku atu i te pepa akakitekite i runga nei ma tona vavai'anga i raro nei:

#### Vavai'anga

1. Akatomoanga
2. Au Ngai Nooanga
3. Tuatua no Tepuka
4. Manamanata i Roto i te Ekalesia Atiu
5. Iriiri Kapua ki te Sinai Hall
6. Nga Ra Mamaata o te Anau Apiianga
7. Kororomotu i Rotopu i te CICC e te Anau Apiianga
8. Kopapa Akateretere no te Apii Takamoa
9. Ngai Okoanga Apinga na te CICC i Nuti Reni
10. Ra Taeanga Evangelia
11. Orometua John Sturney
12. Au Apiianga ki Takamoa 2006
13. Uipaanga Maata 2007 ki Nuti Reni
14. Tere no te Arutanga Ekalesia ki Nuti Reni e Autireria, 2008
15. Akanooanga no te au Tere ki Nuti Reni e Autireria
16. Moni Akaputu ki te Pute Maata
17. Akakaiauanga Moni ki te Pute Maata
18. Nga Mata o te Kumiti Akaaere ki Aitutaki
19. Tere ki Pamati
20. Au Teretereanga o te Kumiti Akaaere
21. Ripoti a Tangi Kapi no tana Terenianga ki Sydney
22. Ingoa Maori no te CICC
23. Reo Akameitakianga Openga na te Ekalesia Matavera
24. Kiritimiti e te Mataiti Ou
25. Popani

Otira ua, .....

  
Nga Mataio  
Tekeretere Maata

-----  
**President:** Rev. Tangimetua Tangatutai Phone: 26541 (home) Email: [adminpub@oyster.net.ck](mailto:adminpub@oyster.net.ck)  
**General Secretary:** Nga Mataio Phone: 23900 (home), 28711 (work) Fax: 21881 (work) Email: [mataio@agriculture.gov.ck](mailto:mataio@agriculture.gov.ck) (work)  
**General Treasurer:** Oki Teokoitu Phone: 23435 (home), 22680 (work) Fax: 20566 (work) Email: [okirua.teokoitu@hsbcbp.com](mailto:okirua.teokoitu@hsbcbp.com) (work)  
**Principal:** Rev. Vaka Ngaro Phone: 26452 (home) Email: [vngaro@oyster.net.ck](mailto:vngaro@oyster.net.ck)

## **KARERE NUMERO 3 MEI ROTO ATU I TE KUMITI AKAERE**

*(Akapapaia e Nga Mataio, Tekeretere Maata, CICC)*

### **1. Akatomoanga**

“Ko te aroa mou teia, kare na tatou i aroa atu iaia.”

Kia orana akaou e taku au taeake rave angaanga i roto i te Atua. E tau ia tatou kia akameitaki i te mana katoatoa koia tei oronga mai i teia tikaanga manea kia aravei Evangelia akaou tatou na roto i teia aenga pepa no te toru o te taime. Ko te karere openga teia mei roto atu i ta tatou Kumiti Akaere no teia mataiti, ka akara tamou atu ei ki ta te mataiti ou ka oronga mai. Mei te nga karere mua e rua tei tukuna iatu, tei roto i teia tataanga tetai au mea tei manako te kumiti e, e mea puapinga kia kite kotou no runga i te teretere marie anga o to tatou vaka Evangelia i teia tuatau.

E mea puapinga rava e te au tavini o te Atua e Ekalesia ta kotou e tiaki ra i teia tuatau, kia viviki teia au akakitekiteanga kia akatotoaia ki taau anana. Kua kitea mai i roto i nga karere mua e, kare te reira i tukuna vave iana ki te Ekalesia kua pou nga marama. No reira te pati atu nei au no te Kumiti Akaere, oronga akakite atuna kotou i teia au leta akakitekite ki te au taeake ma te au tuaine i roto i te akarongo auraka e tivata. Me ka akaruke ua oki kotou i te au karere ki roto i ta kotou au vairanga ma te kore e akakiteia, ka oki mai te apa kia matou i Rarotonga nei e kare a matou tuatua e tuku atuna kia kotou.

Ko tetai ravenga e raveia nei e tetai au Ekalesia i te akatotoa anga i teia au newsletters koia oki ka nenei (photocopy) e oti tua ki to ratou au mema. Tetai pae e uipa takake ana ratou no te akakite i te karere. Na kotou e akara i te ka mama kia kotou.

Teia ireira te au manako kia kite mai kotou.

### **2. Au Ngai Nooanga**

Meitaki maata kia kotou tei akarava mai e tei akatano mai i to kotou au ngai nooanga (contact addresses). Te vai atura ra te maata anga kare i akakite mai ake i to ratou turanga. No reira te oronga akaou atu nei te patiangā, e mea puapinga kia tuku mai kotou i teia au mea i raro nei me kare kotou i tuku mai ake:

- Toou to te Orometua numero phone, fax, email me kua tu koe i teia au apinga
- Ingoa, address, numero phone, fax, email a toou Tekeretere
- Ingoa, address, numero phone, fax, email a toou Mou Moni

Te vai ra te au atianga e akapuapinga ia'i teia au mea i runga nei. Me tae ki te reira au tuatau e kare e akakiteanga me kore kare i rava te akakiteanga i roto i ta matou akapapaanga no to kotou au ngai nooanga, ka riro te reira ei akatukau i tetai au akakoroanga ta tatou ka na roto.

Kua tae katoa mai te ripoti e te tavarevare nei teia au akakitekiteanga i te tae atu, kia kotou tika i te pa enua tokerau. Kua kimikimi iatu ki te ngai tuku anga pepa (post office) i te tumu anga i pera ei, e oti akera kua atea takere mei Takamoā mai, e te vai ra te au akamaramaanga tei orongaia mai. No reira ko kotou e te au Ekalesia i roto i teia turanga e penei kare ko kotou ua i te pa enua tokerau, akakite viviki mai kia kimi iatu tetai au ravenga ke kia tae vave atu teia au karere kia kotou. Penei ka akatika mai te au opati o te Kavamani i te pa enua tokerau kia taangaanga i ta ratou fax me kore email no teia akakoroanga.

### **3. Tuatua no Tepuka**

Te tere maru ua nei te au akanoonoanga no te akakoroanga taangaanga anga i teia enua tei oki mai ki te akonoanga, ei ravenga kimi puapinga no te turu atu anga i tetai au porokaramu angaanga a te akonoanga. Te irinakiia nei e ka oti te au akanoonoanga katoatoa i mua ake i te

openga o teia mataiti, akamata atu ei te taangaanga i te au tamanakoanga i roto i te mataiti ou e tu mai nei. Tei roto katoa oki teia tumu manako i nga karere mua tei tuku iatu, e ka akamaata iatu te akamaramaanga a teia au nuti leta ki mua.

#### 4. Manamanata i Roto i te Ekalesia Atiu

I te marama Tepetema i topa, kua tupu tetai manamanata i roto i teia Ekalesia a tatou, te tumuanga ko taua mea rai ko te bapetizo taruku. Kua piri atu te Orometua Tangaroa Tekeu kia Tutai Pere i te rave kapiti anga i teia angaanga e kua tae rava tetai tuanga o te au peu tei rave iatu e teia nga taeake ki roto i te Are Pure o Atiu. Kua taruku iatu tetai pae o te Ekalesia, kua noo tinamou rai tetai pae ki te tango ketaketa tei akarukeia mai e to ratou ui tupuna. E mea akaaroa teia tei tupu, i te mea oki e koi oti uake nei te uipaanga maata e te tukuanga tika no runga tika'i i teia tumu manako.

Kia tae mai te pepa akakite a te Tekeretere o teia Ekalesia ki te Orometua Ngateitei, kua tono iatu e rua mata o te Kumiti Akaaere (Papa Kura Strickland e Rev. Nio Mare) ki Atiu no te kimikimi oonu atu ki roto i teia manamanata. Kia oki mai teia nga mata, kua raveia tetai uipaanga rapurapu na te Kumiti Akaaere no te akarongo atu i te ripoti. I muri ake i ta raua ripoti anga mai, kua akaari te au mata katoatoa i runga i te Kumiti Akaaere i to ratou manako. Ei akapoto i te tuatua, kua tuku atu te Orometua Ngateitei ki te vouti e me ka noo rai te Orometua Tangaroa Tekeu ki roto i te Ekalesia kia tau ki ta teia nga taeake i tamanako mai i roto i ta raua ripoti, me kore ra kia akaatea iatu kia tau ki te tuku anga tika a te uipaanga maata. Teia tei rauka mai i roto i te voutianga, mari ua ko te Tekeretere Maata e pera te Mou Moni Maata, kare te toenga o te kumiti i ariki e kia akaatea iatu te Orometua noatu te manamanata tana i akatupu. Ko te utunga tei orongaia kiaia, koia oki kia akamatakiteia/akatanoia (discipline) te Orometua Tangaroa Tekeu no tana i rave. Kua tuku iatu ireira tetai leta akamatakiteanga kiaia no teia tei tupu.

Penei ka tuatua tetai pae e, eaa ka ripoti ia'i teia manamanata ki roto i teia newsletter? Teia te pauanga, me kare e na te Kumiti Akaaere e ripoti atu kia kotou, ka tarevake paa kotou me akarongo taringa a muri ake. Noatu rai oki e kare e ripoti iatu i teia taime, ka rongo rai kotou a tetai tuatau. No reira e mea tau e te puapinga e na te Kumiti Akaaere rai e ripoti atu kia kotou katoatoa i teia tei tupu, e i akapeea te tukuanga tika a te Kumiti Akaaere.

#### 5. Iriiri Kapua ki te Sinai Hall

E iriiri kapua teia tei tuku atu te Kumiti Akaaere i mua na i te patianganga tauturu ki te taokotaianga Pacific Conference of Churches (PCC) i Fiji no tetai akapouanga moni kia rauka teia akakoroanga i te akatupu. I muri ake i to te Kumiti Akaaere o teia ra akamata anga i te angaanga, i tae mai ei te akapapu mei te PCC mai e ka tauturu ratou i teia akakoroanga. Te akapouanga moni (budget) no teia akakoroanga tei tuku mai te PCC e NZ\$5,000.

Ko te ingoa papaa o teia iriiri kapua koia oki, "The Prophetic Role of Church Against Corruption and Injustice." Tona ingoa maori i taku urianga, "Ta te Ekalesia tuanga i te tamaki atu anga i te tapikikaa e te au angaanga taukore."

Kua rave iatu teia iriiri kapua i te Monite 14 Noema 2005 ki te Sinai Hall, Avarua CICC. Teia te porokaramu tei aru ia:

|                      |                              |                               |
|----------------------|------------------------------|-------------------------------|
| 8.30am               | Devotion                     | Rev. Nio Mare, Avarua CICC    |
| 8.45                 | Welcome address              | Nga Mataio, General Secretary |
| 9.00 – 10.00         | Ron Crocombe                 | Social/cultural issues        |
| <b>10.00 – 10.30</b> |                              | <b>Morning tea</b>            |
| 10.30 – 11.30        | John Herrmann                | Political issues              |
| 11.30 – 12.30        | Nga Mataio                   | Economic issues               |
| <b>12.30 – 1.30</b>  |                              | <b>Lunch</b>                  |
| 1.30 – 2.30          | Rev. T. Tangatututai         | Religious issues              |
| 2.30 – 3.00          | Evaluation/resolutions/close |                               |

Ko tei patii e tei tae mai ki teia apii, ko te au Orometua katoatoa e tiaki Ekalesia nei i te pa enua tonga (16), takitai mata mei roto mai i te au Ekalesia i te pa enua tonga (16), te anau apiianga (12), e pera tetai au taeake i runga i te enua i te reira tuata, mei te Tauturu Orometua o Omoka. Mei te 50 au taeake tei piri mai ki roto i teia akakoroanga. No te rava-kore o te akatuanga moni i kore ei i rauka kia apai mai i te au taeake mei te pa enua tokerau.

E au manako tetai tei rauka mai mei roto i teia iriiri kapua tei anoano te Kumiti Akaaere kia akatotoa iatu ki te au Ekalesia katoatoa. Ka raveia teia akamata i roto i te nuti leta ka aru mai i teia.

## **6. Nga Ra Mamaata o te Anau Apiianga**

Kua manea te angaanga tei rave iatu ki ta tatou anau apiianga i te Ruitoru 30 Noema 2005 ki te Sinai Hall, Avarua CICC. Mei tei akakite iatu i roto i te newsletter numero 2, ko te ra teia i akararangi ia'i ratou no te akaotianga i te apii (graduation) tei aruaru ratou i roto i nga mataiti e 4 i topa. Kua riro te kaikai i te reira ra e na te anau apiianga rai i rave mai.

Teia te au ingoa o te anau apiianga tei akararangiia:

|                                   |                         |             |
|-----------------------------------|-------------------------|-------------|
| 1. Rev. & Mrs. Ngatokorua Pepe    | Ekalesia South Auckland | New Zealand |
| 2. Rev. & Mrs. Mokoha Kora        | Ekalesia East Tamaki    | New Zealand |
| 3. Rev. & Mrs. Ina Moetaua        | Ekalesia Oiretumu       | Mauke       |
| 4. Rev. & Mrs. Terepai Kauvarevai | Ekalesia Auckland City  | New Zealand |
| 5. Rev. & Mrs. Uru Tairea         | Ekalesia Oiretumu       | Mauke       |
| 6. Rev. & Mrs. Tuakeu Daniel      | Ekalesia Dandenong      | Australia   |
| 7. Rev. & Mrs. Charles Pange      | Ekalesia Whiterock      | Australia   |
| 8. Rev. & Mrs. Ranginui Vini      | Ekalesia Christchurch   | New Zealand |
| 9. Rev. & Mrs. Junior Pumati      | Ekalesia Arutanga       | Aitutaki    |
| 10. Rev. & Mrs. Teametua Pouao    | Ekalesia Hutt Valley    | New Zealand |
| 11. Rev. & Mrs. Fakeau Joseph     | Ekalesia Liverpool      | Australia   |
| 12. Rev. & Mrs. Sorimata Arama    | Ekalesia Whiterock      | Australia   |

Mei tei akaotiia i roto i te uipaanga maata i topa, kua raveia rai to ratou akatainuanga (ordination) i te Sabati Oroa 4 Titema 2005 ki te Sinai Hall rai. Kua riro e na te Orometua Ngateitei e tona au taeake Orometua i rave atu i teia tuanga. Kua riro te kaikai anga i te reira ra e na te Rarotonga Konitara Ekalesia i rave.

I teia atianga ireira kua oki atu ratou ki roto i ta ratou au Ekalesia tatakitai i te tapapa atu no te kapikianga te ka tae kia ratou no te rave atu i te angaanga a to tatou Atu.

## **7. Kororomotu i Rotopu i te CICC e te Anau Apiianga**

No te manamanata tei tupu ki Atiu, e pera te au nga'a anga Ekalesia e manganui ta tatou i kite i te au tuata i topa, e pera te tu akarongo-kore me kore kauraro-kore o tetai au taeake Orometua i roto i te Ekalesia, kua manakoia mai ireira e kia angaia tetai kororomotu (agreement) i rotopu i te CICC e te anau apiianga. Ko tetai mea maata i roto i teia kororomotu nei koia oki kia kauraro te anau apiianga ki raro ake i te akateretereanga a te apii Takamoa, e pera me pou to ratou tuata ki Takamoa e i mua ake ka tomo ei ratou ki roto i tetai Ekalesia, ka kauraro ratou ki raro ake i te akanoonooanga a te reira Ekalesia e pera ta te akonoanga CICC. Me kare te au apiianga e inangaro i te taina (sign) i teia kororomotu, tera oki te aiteanga kare ratou e inangaro i te kauraro ki raro ake i te akateretereanga a Takamoa, kare ireira ratou e akatikaia kia tomo ki Takamoa.

I tetai tua oki, penei ka taina te apiianga i te kororomotu i te akamataanga o te apii no te mea kua anoano aia kia tomo rai ia Takamoa. E kia tae ki te openga o te terenianga, kua tieni tona manako e kare aia e inangaro i te kauraro ki raro ake i te akateretereanga a te au Ekalesia e pera ta te

akonoanga CICC. I na, me ko teia te tu o te reira apiianga, kare ireira o ratou tikaanga e orongaia kia tiaki i tetai Ekalesia i raro ake i te tamaruanga a te CICC.

Kua ariki te Kumiti Akaaere e kia taangaanga iatu teia kororomotu akamata ki runga ia ratou tei akaoti atu mei Takamoa i teia mataiti, e pera ratou ka akamata mai a teia mataiti ki mua.

### **8. Kopapa Akateretere no te Apii Takamoa**

I roto i te uipaanga openga a te Kumiti Akaaere no teia mataiti 2005 tei raveia i te ra 8 Titema, kua arikiia e kia akaara akaouia teia kopapa (board) tei noo uana no tetai tuatau roa. Ka riro teia kopapa e na te Puapii Maata rai e akatere; koia oki te tama akatereau (chairman). Kua oti katoa ta teia kopapa akatakaanga angaanga (terms of reference) i te tata, e ko tana ia ka aru no nga mataiti e 4 e tu mai nei. A teia nuti leta ki mua e akapapu iatu ei e koai ma uai tei runga i teia kumiti. I teia atianga e au ingoa tetai tei tamanakoia.

### **9. Ngai Okoanga Apinga na te CICC i Nuti Reni**

I teia au mataiti i topa, e apaiia maina ta tatou Buka Tapu e te Buka Imene mei te ngai e nenei ia'i koia oki i Wellington, NZ, ki Rarotonga, e oti kua tuku akaou iatu kia ratou tei anoano i Nuti Reni e pera i Autireria. E moni maata ireira te akapou iana no te tuku anga (freight) i teia au Buka.

I teia atianga ra, te komakoma nei te Kumiti Akaaere ki te opati o te Kavamani Kuki Airani i Auckland, kia riro te reira opati ei ngutuare vaio anga i ta tatou Buka e tetai atu au mea mei te Tia, no ratou i Nuti Reni e Autireria kia ngoie ua i te tiki atu ki reira. Ka akapapu iatu i roto i te nuti leta ki mua e, eaa te turanga no teia kimianga ravenga.

### **10. Ra Taeanga Evangelia**

No kotou e te au Ekalesia i vao mai ia Rarotonga, kua manea tika'i te angaanga tei raveia mai e nga Ekalesia i Rarotonga nei no te akamaara anga i te 184 mataiti i to te Evangelia tae anga mai ki te Kuki Airani nei. Kua riro oki e na te Ekalesia Titikaveka i akanoo i te porokaramu o te reira ra. I te mataiti 2006 e tu mai nei, ka neke te angaanga ki te Ekalesia Ngatangia.

Penei kua akamata takere tetai pae ia tatou i te akamanako i te 200 anga mataiti o te Evangelia ki o tatou nei. I na, e 16 mataiti toe kua taea teia turanga i te mataiti 2021. E tano ei e ka moemoea nga Ekalesia i Aitutaki no tetai akamaaraanga maata kia raveia ki reira. Ka tapapa atu tatou i ta te aronga akara reva ka akanoo mai me akavaitata atu tatou ki te reira tuatau.

### **11. Orometua John Sturney**

E taeake teia mei Paratane mai kua rave ana i te angaanga Orometua ki te Kuki Airani i nga mataiti 1960-64. E tere orote tona e te aravei akaou i tona au taeake e tana au tangata i matau i te reira tuatau. Kua pou rai iaia tetai 6 epetoma i te noo anga ki Rarotonga nei e pera e tai epetoma ki Aitutaki. Kua piri katoa mai oki aia ki te ra taeanga Evangelia tei akamaara nga Ekalesia i Rarotonga nei i te ra 26 o Okotopa ki te Ekalesia Titikaveka. E au apinga taito (carvings) tei orongaia kiaia e tona tokorua ia raua i oki ki Paratane i te mataiti 1964, kua manako aia e, e mea meitaki kia akaoki mai aia i teia au mea ki te Kuki Airani nei. Kua ariki rekareka te akonoanga i teia au mea tana i akaoki mai, e ka vai te reira ki Takamoa.

I roto i te uipaanga a te kumiti i te Paraparau 10 Noema 2005, kua piri mai teia taeake ki te katikati (lunch) i muri ake i te uipaanga. Kua oki atu aia ki Paratane i te Varaire ake.

### **12. Au Apiianga ki Takamoa 2006**

Ko te au Ekalesia e, e apiianga ta kotou ka tomo ki Takamoa i teia mataiti e tu mai nei 2006, e mea papu e kua tae atu te akakiteanga a te Puapii Maata. No reira ka akateateamamao mai

ratou kia tae mai i te ra tei akata atu te Puapii Maata. Teia oki te au tamariki tei arikiia kia tomo ia Takamoa i te mataiti e tu mai nei:

|                                 |                         |             |
|---------------------------------|-------------------------|-------------|
| 1. Mr. & Mrs. Harry Rongo       | Ekalesia South Auckland | New Zealand |
| 2. Mr. & Mrs. Rahai Nanua       | Ekalesia South Auckland | New Zealand |
| 3. Mr. & Mrs. Arerau Maa        | Ekalesia Tautu          | Aitutaki    |
| 4. Mr. & Mrs. Mau Vaerua        | Ekalesia Liverpool      | Australia   |
| 5. Mr. & Mrs. Tapaitau Marsters | Ekalesia Westcourt      | Australia   |
| 6. Mr. & Mrs. Tengaru Paniora   | Ekalesia Clayton        | Australia   |
| 7. Mr. & Mrs. Akatika Nanua     | Ekalesia White Rock     | Australia   |
| 8. Mr. & Mrs. Munakoa Dean      | Ekalesia East Tamaki    | New Zealand |
| 9. Mr. & Mrs. Tekotia Joe       | Ekalesia Otahuhu        | New Zealand |
| 10. Mr. & Mrs. Henry Ford       | Ekalesia Clayton        | Australia   |
| 11. Mr. & Mrs. Vainekiki Porio  | Ekalesia Dulwich Hill   | Australia   |

Kare te Kumiti Akaaere i ariki i te patianganga a tetai au taeake kia tomo mai ki Takamoa a teia mataiti ki mua 2006, no tetai au tumuanga mei te tare mataiti. Kua turu te Kumiti Akaaere e kia aru ia rai tei akaotia no runga i te tare mataiti tangata no te tomo ki Takamoa. No reira akakoromaki mai kotou e te au Ekalesia e pera te au taeake kare ta kotou patianganga i arikiia. Penei te vai ra te au raveanga e rauka'i ta kotou e anoano ra kia akatupuia.

### **13. Uipaanga Maata 2007 ki Nuti Reni**

Te rekareka nei au i te ripoti atu ki te au Ekalesia katoatoa e kua tae mai te akapapuanga mei te Konitara Ekalesia o Nuti Reni e kua anoano ma te ariki rekareka ratou i te apai (host) i te uipaanga maata o te mataiti 2007 ki te oire Akarana. I teia atianga kare i papu ake e koai te marama e rave ia'i te uipaanga. Kare ra tatou e akarapurapu ia Nu Tireni no teia; ka tapapa uatu tatou i ta ratou ka akakite mai. Te vai nei oki tetai nga uipaanga mamaata a ratou, mei te uipaanga a te au Orometua ki Christchurch i roto ia Peperuare e tu mai nei, e pera ta ratou uipaanga konitara maata ki Invercargill i roto ia Okotopa 2006. Penei kia oti teia nga uipaanga, ireira ratou akapapu mai ei i te marama e te au ra no te uipaanga. Te irinaki nei au e ka papu mai teia i mua ake i te openga mataiti 2006.

No reira tatou e nga Ekalesia i te Kuki Airani nei e pera to Autireria, ko te tuatau rai teia i te teateamamao no te tere atu ki Nuti Reni. Kua kite au e ka ngata te apainga ki runga iakoe e nga Ekalesia i te pa enua tonga e pera tika'i kia kotou i te pa enua tokerau. No reira oki tetai i anoano maata ei au kia akapapu mai a Nuti Reni no runga i teia tumu manako, kia rava meitaki te tuatau akateateamamao no tatou i te Kuki Airani nei no te tere atu ki Nuti Reni. Ka riro katoa oki to tatou tere anga ki Nu Tireni ei oronga i tetai tuatau akangaroi (break) no nga Ekalesia i Rarotonga nei no te tua o te utuutuanga i te uipaanga.

Ko te aiteanga o te teateamamao taku e tuatua nei koia oki te akaputupuanga (save) i te moni no te tutaki patete. Kua marama oki tatou e ko tetai akapouanga maata teia i roto i te au teretereanga ravarai.

### **14. Tere no te Arutanga Ekalesia ki Nuti Reni e Autireria, 2008**

Kua tae mai te patianganga ki te Kumiti Akaaere mei teia Ekalesia a tatou, kia rauka tetai tikaanga kia teretere atu ratou kia kotou e nga Ekalesia i Nuti Reni e Autireria no te kimi puapinga ei tauturu i te akakoroanga akaouanga i te are pure Siona Tapu i Arutanga. Kare o te Kumiti Akaaere manamanata no teia patianganga i te mea oki e i teia tuatau, kare e patianganga ke atu i tae mai ki te Kumiti Akaaere kia tere atu mei konei i te mataiti 2008. Inara mei tei akaotia i roto i te uipaanga maata o teia mataiti 2005, ka riro naau e nga konitara Ekalesia o Nuti Reni e Autireria e tuku i te tika openga no runga i te tuatau tau kia tere atu ratou. No reira e teia nga konitara, tena te patianganga a Arutanga na kotou e akara mai. Me ka tika kia uri kotou i te reira ki roto i ta kotou nga konitara, ka akakite mai ei i te tika openga ki te Kumiti Akaaere e pera ki teia Ekalesia a tatou i

Aitutaki. Me ka rauka mai to korua manako i mua ake ia Peperuare i teia mataiti ki mua 2006, meitaki atu ia, ka riro te reira ei tauturu i te Ekalesia kia akateateamamao vave no te tere atu.

#### **15. Akanooanga no te au Tere ki Nuti Reni e Autireria**

Mei tei arikiia i roto i te Uipaanga Maata i oti uake nei (akara ki te Resolutions o te Ruirua 26 Tiurai 2005, akatikaanga numero 2), kia riro e na Nuti Reni e Autireria e akanoo mai i te au tere kimi puapinga ki reira. Teia ireira tei oti i te Konitara Autireria i te akanoo mai:

- i. okotai i te mua mataiti (Tianuare – Tiunu), e okotai i te openga mataiti (Tiurai – Titema)
- ii. kia aruia te apapaanga mei te numero tai e aere uatu
- iii. ka akamata teia akanoonooanga i te mataiti 2006 e tu mai nei
- iv. kia na roto i te Kumiti Akaaere te akakite ki te katoatoa no teia akanoonooanga i runga nei.

No reira e te au Ekalesia katoatoa, tena tei oti i te Konitara Autireria i te akanoo, e te pati akatenga mai nei ratou, ma te turu pakari iatu e te Kumiti Akaaere, kia aru te katoatoa i teia akanoonooanga. Me ka marokiakia tatou e kare e ariki i teia, te kite marama uatu nei te Kumiti Akaaere e ka taii a muri ake. Penei ka tuatua tetai pae e, kare ratou e patia ki roto i te au Ekalesia tatakitai, ka aere ra ratou ki to ratou uarai iti tangata. Teia te pauanga ki konei, koai oki ia Ekalesia ka akara mata ua mai i teia au tere e kare e manako no te arikiiki mai?

Me tae mai ta Nuti Reni akanoonooanga no runga i teia tumu manako, ka akakite iatu rai ki te katoatoa.

#### **16. Moni Akaputu ki te Pute Maata**

E nga patianganga tetai tei tae mai ki te Kumiti Akaaere kia akara akaouia ta ratou moni akaputu ki te pute maata, kua maata rava te akakake anga tei orongaia mai i roto i te uipaanga maata i oti uake nei. Kua oronga iatu teia nga patianganga ki te kumiti o te moni kia akara mai ma te akaoki mai i te manako ki roto i te Kumiti Akaaere.

Kua akaoki mai te Mou Moni i te manako o tana kumiti o te moni e kare ratou i ariki i teia nga patianganga i te mea oki e, e tika uipaanga maata teia tei tuku ia. Kua ariki te Kumiti Akaaere i teia manako o te kumiti o te moni, e te akaoki atu nei ireira au i teia manako ki te katoatoa kia kite mai kotou. Penei e mea tau kia uri meitaki akaouia teia tumu manako i roto i te uipaanga maata e tu mai nei.

#### **17. Akakaouanga Moni ki te Pute Maata**

Kare teia e te au taeake i te tuatua meitaki rava kia akakite iatu. I te au tuatau i topa kua taangaanga iana te moni a te pute maata a ta tatou nei akonoanga CICC ei akakaouanga (loan) na tetai au mema rai o tatou. Kua taangaanga katoa iana te moni a te CICC ei paruru (security me kore guarantor) i te loan a tetai pae. I roto i teia nga raveraveanga, kua taii te akonoanga i muri mai.

Teia ireira te akateretereanga ou mei teia taima e aere uatu kia kore tatou e taii akaou ki te au banks, kare a akatika akaouia teia au peu kia raveia. Kua manako te Kumiti Akaaere e me kua anoano tatou i te tarau moni, ka aere pouroa tatou ki te au ngai e na ratou teia tuanga angaanga, koia oki te au banks. Kare rava oki tatou e inangaro kia taii akaou i roto i teia au peu, riro mai ei ireira te akonoanga i te tutaki i te au tarauanga kare i peke i te tutaki. No reira ariki mai kotou i teia akateretereanga ou.

#### **18. Nga Mata o te Kumiti Akaaere ki Aitutaki**

Kua pati mai te Ekalesia Arutanga i te Orometua Ngateitei e te Tekeretere Maata ki te akakoroanga akatainuaanga i te Tauturu Orometua ou o te Arutanga Ekalesia koia a Taia Charlie. Kua akangaroi mai oki te metua tane Papa Tikaka Henry mei runga i teia taoanga. Kua oronga

iatu te akairo kia raua na roto i te Certificates tei maani ia i roto i te opati i mua ake ka aere atu ei teia nga tokorua. Kua rauka katoa tetai atiangā no nga tokorua i te atoro atu i nga Ekalesia i Tautu e Vaipae. Kua puapingaia teia tere e kua meitaki ua te au angaanga tei raveia. Te oronga atu nei maua ko te Orometua Ngateitei i te reo aroa o te Ekalesia Arutanga, Vaipae e Tautu kia kotou katoatoa e te au oa rave angaanga o te Atua e ta kotou anana i roto i te au Ekalesia i te Kuki Airani nei, to Nuti Reni e pera kotou i Autireria.

### **19. Tere ki Pamati**

Kua tae mai tetai patiangā ki te Kumiti Akaaere mei Pamati mai ki te Orometua Ngateitei no tetai Orometua kia tae atu ki te reira enua no te akakoroanga bapetizo tamariki e pera tetai akaipoipo. Kua tuku te kumiti o te au Orometua i te taeake Rev. Tutai Nooana, Director of Publications, kia apai i teia tuanga.

Ko te Orometua Anesi oki tei tukuia ki teia enua no te tiaki ki te Ekalesia ki reira, inara kua oki mai aia e i te irinakianga tei Nuti Reni aia i te ngai i noo ei i teia tuatau. Ka akara te kumiti i tetai akaou Orometua no te tuku atu ki teia Ekalesia.

### **20. Au Teretereanga o te Kumiti Akaaere**

Te vai ra tetai au akakoroanga mamaata i roto i te au Ekalesia e kua anoano ratou i te Kumiti Akaaere kia mata ia, mei te akatainuanga Tauturu Orometua. Te anoano nei te Kumiti Akaaere i te akakite ma te akamarama atu e, i roto i teia au akakoroanga e kua anoano kotou kia mata ia te Kumiti Akaaere, ka riro rai e na kotou e tutaki mai i te patete e pera to ratou ngai nooanga. Ko tetai mataara kare kotou e anoanoia kia rave i teia, koia oki me e teretereanga to tetai au mata o te kumiti e kua tano ki to kotou akakoroanga i runga i te enua, ka patia kia ratou kia riro e na ratou e mata i te kumiti ki te reira au akakoroanga o kotou. E au ravenga teia e akarakara nei matou no te akaiti anga mai i te akapouanga moni. Kua marama oki tatou e, e moni maata te pou ana i te tutaki pairere e tae ei tatou ki te au ngai tei akakoroia.

### **21. Ripoti a Tangi Kapi no tana Terenianga ki Sydney**

E ripoti teia tei tata a Tangi Kapi, to tatou mou moni i mua na, no runga i tona tere e 6 epetoma ki te Allan Walker College of Evangelism i Sydney, Autireria. Kua tua'ia te au kapi (copies) na te katoatoa. Kua manako te kumiti i te pati kia Tangi kia anga mai i tetai porokaramu angaanga nana, kia akara te kumiti, penei ka rauka tetai tauturu kia oronga iatu ki teia taeake kia akatupu i te au tamanakoanga tei tata aia i roto i tana ripoti.

I roto ireira i te uipaanga a te Kumiti Akaaere i te ra 8 o Titema nei, kua orongaia tetai tikaanga kia Tangi kia akarava mai i te akamarama no runga i te au tamanakoanga o tana ripoti. Kua ariki te kumiti e kia akamataia tetai tuanga angaanga i roto i to tatou opati i Takamoa koia oki te counselling service. Ko tetai tamanakoanga maata oki teia i roto i tana ripoti. Ka riro rai a Tangi ei akamata i teia tuanga.

Kia marama ua tatou e te riro nei tetai au tavini o te Atua i te rave katoa i teia tuanga, e te pati atu nei te Kumiti Akaaere kia maroiroi uaturai kotou i te rave anga i teia tuanga puapinga. Te kitea mai nei oki e te maata uatu ra te manamanata ngutuare, tamariki ki te metua, tane ki te vaine, e kua maata atu te anoano kia akamatutu iatu teia tuanga tauturu koia te counselling.

### **22. Ingoa Maori no te CICC**

Kua puta mai teia manako i roto i tetai uipaanga a te Konitara Ekalesia o Rarotonga nei, e kia atu ia mai tetai ingoa maori no te akonoanga, auraka kia kapiki akaouia tona ingoa papaa koia te Cook Islands Christian Church. Ko teia tumu manako kua oti takere aia i te akatakaia i roto i te ture tumu o te 1968 e pera te ture tumu tei akaouia i te mataiti 2003. Ko te ingoa maori oki, ko te "Ekalesia Keretitano o te Kuki Airani (EKKA)." Ko teia oki te ingoa e taangaangaia nei e tetai Ekalesia a tatou i Wellington. No reira e te au Ekalesia, me ko kotou tetai e manako akapera nei,



ko te akamaramaanga ki konei koia oki kare te ture tumu e anoanoia kia tieniia no teia tumu manako. Kua oti takere te ingoa maori i te angaia, e ka taangaanga kotou tei anoano i te kapiki i ta tatou akonoanga i te reo maori. Ko kotou tei anoano kia noo rai ki te ingoa papaa, eaa oki te manamanata. Me kare e pumaana ana teia akamaramaanga, apai mai i te manako ki roto i te uipaanga maata 2007, ireira tatou akarava atu ei i te manako.

### **23. Reo Akameitakianga Openga na te Ekalesia Matavera**

Na roto i te patianganga a teia Ekalesia, te oronga akaou atu nei te Kumiti Akaaere i te reo aroa e te akameitakianga a teia Ekalesia a tatou kia kotou katoatoa no te taime openga, no to kotou ngakau maoraora i te tauturu anga mai i te akameitaki akaouanga i te Are Pure Silo tei paia e te urii i te momua o teia mataiti. Tena oki ta tatou i kite i te akatuera akaouia anga teia ngutuare i te tuatau o te uipaanga maata. Kua riro oki e na teia Ekalesia i apai (host) i te uipaanga maata 2005, te akatueraanga e pera te topirianga. No reira e te au Ekalesia, te au taeake ma te au tuaine, ariki mai i te reo akameitakianga openga mei roto mai i te Matavera Ekalesia.

### **24. Kiritimiti e te Mataiti Ou**

E te au taeake ma te au tuaine, te akavaitata akaou atu nei tatou ki te tuatau e rekareka ngakau ei tatou i te akamaaraanga i te ra i aroa mai ei to tatou Atua ia tatou te tangata ara nei, na roto i te oronga anga mai i tana tamaiti anau tai, ei akatinamou i to tatou irinakianga e te oroanga ki roto i te akarongo. E tuatau timataanga katoa oki teia i te tavarenga anga i to tatou ngakau kia akara tamou ki to te ngutuare e te au mea tei anoanoia e to tatou au kopapa. I te mataiti ou e tu mai nei, kare e ekoko e te angaanga nei to tatou au manako i te kimi anga e, eaa ra ta tatou ka rave ei akapuapinga atu i to tatou nei oraanga kopapa. Kare oki o kotou puapinga me kare au i rotopu ia kotou i na Iesu ei. No reira na roto i teia tuatau mataora ta tatou ka tomo, kua marama tatou e ka akaoki ua rai tatou i te akameitakianga ki te Atua no tona aroa maata ia tatou te tangata ara nei.

Te rauka nei ireira iaku i te oronga akakite atu i te reo aroa o te au mema katoatoa i runga i ta tatou Kumiti Akaaere i teia tuatau, i to ratou reo aroa kia kotou katoatoa no teia tuatau akaepaepa anga ta tatou e tomo atu nei. Kia riro te tuatau Kiritimiti ei mataora anga no tatou i roto i te ngutuare e pera ei tuatau akavaitata atu ki te Atua, e pera kia riro te mataiti ou e tu mai nei ei mea meitaki atu i teia ta tatou ka akaruke. I roto i tetai ao mai reo o tatou, Merry Christmas and Happy New Year to you all mei roto atu i te Kumiti Akaaere.

### **25. Popani**

Tena ireira e te au taeake ma te au tuaine te au mea tei anoano ta kotou Kumiti Akaaere kia oronga akakite atu ei kiteanga no kotou i te au mea e tupu nei, e te parani ia nei no teia au tuatau ki mua i roto i ta tatou nei akonoanga. Irinaki matou e ka riro teia au akakitekiteanga ei pumaana ki roto i to kotou au ngakau tatakita.

Ei taopenga i teia karere, teia te reo o te apai taoanga tamaki ki tona pu ia Ionatana, *“Ka rave koe i ta to ngakau e inangaro ra, ka aere ra, i na, tei vaitata katoa au ia koe i taau e anoano ra.”*  
Ei konei tatou i te tuatua i tona aroa ua, Amene.